

養
古
齋
叢
錄

養吉齋叢錄二十六卷餘錄十卷吳尙書仲雲先生遺箸文孫子修編修授鄉里後生譚獻讀竟敘之曰古者柱下之史孔氏所訪太史公之所掌漢初與丞相同尊掌故之學爲千載表儀凡夫德禮政刑質文興廢一朝設施流及後世有以觀采損益爲先進之從焉六官分之柱下合之夫固盛業也哉先正吳公策名載績颺歷優畎所以潤色王廷專施疆域者且數十年博于聞見洞于本末行政之餘日奏議之鈎稽涉筆綴文皆關掌故循厥端緒則朝章國典沿革人文而懲前毖後保泰持盈胥可言外得之宮閭樞機曹司侍從以逮環事軼聞條舉而件繫皆正史志表之端委閒有所聞異辭正所以備攷證昔者誦言太史公之學旣世而如我公久任封圻又非不治民之比令子觀察分巡今者孫曾子修嗣齋繼美史職楹書之寄正不待

藏之名山獻幸得先覩妄思以意讀定類次遺編或者分別若
盛典若聖德若故實若興革若異數繼之以嘉言宸翰祕書禁
近宮闈繼之以六曹行省民物而後以辭章佚事舊聞爲閏餘
俾承學之士讀之如游治升平之世矣吳公同時閩王文勤公
雁汀大司寇有石渠餘紀雖體例異同抑亦造車合轍者已函
雅故通古今徵文

盛世由此其選也光緒二十有二年十月譚獻敘

養吉齋叢錄卷之一

賜進士出身雲貴總督翰林院編修臣吳振棫

太宗以下支派稱宗室用黃帶其疏者稱覺羅用紅帶有獲罪挑帶銷除旗檔者卽古之削屬籍也有非宗族而賜姓者如扈爾漢姓佟佳氏從其父扈喇虎率屬來歸賜姓覺羅是也又伊爾根覺羅舒舒覺羅西林覺羅覺羅禪者乃其所受之姓與宗族之稱覺羅不同

附錄 達海世稱滿洲聖人其支下子孫皆用紫帶其女不挑秀女

宗室封爵自親王郡王貝勒貝子以下凡十四等以世遞降此下則爲閒散宗室用四品頂戴惟禮親王睿親王肅親王鄭親王莊親王豫親王順承郡王克勤郡王皆國初有大勳勞者

世襲不降封

或獲罪革爵仍以旁支襲封

京師俗諺謂之鐵帽子王歲時典

禮王公上表或諸王集議大事列銜以禮親王居首又第七奉

恩鎮國公第八奉恩輔國公第九不入八分鎮國公第十不入

八分輔國公八分者或云雙眼翎寶石頂紫韁貂皮墊子奶子

壺卽背壺阿呼喇槍禁敵卽大門上泡釘

錄

王貝勒以下之子若弟有應封而年未及歲尙未得封者年終考試引見一次謂之考應封有賞翎及表裏者旣未得封故有翎無頂亦閒有賞冠頂者

甲喇章京漢文稱參領固山額眞漢稱都統梅勒章京漢稱副都統牛永章京漢稱佐領分得撥什庫漢稱驍騎校又國初各部落長率屬來歸授之佐領以統其衆者曰勦舊佐領率衆歸誠功在旂常賜戶口者曰優異世管佐領僅同弟兄族里來歸

授之以職者曰世管佐領戶少丁稀合編佐領兩姓三姓迭爲是官者曰互管佐領各佐領撥出餘丁增編佐領爲公中佐領太祖旣削平諸國於原設黃白紅藍四旗外增四旗參其色鑲之鑲白正白鑲黃三旗皆天子所自將曰上三旗正黃正紅鑲紅正藍鑲藍曰下五旗

按國初各部落及漢人之歸附者分隸滿蒙漢八旗亦時有改易如華善本隸漢軍正白旗其先蘇完人因改入滿洲籍此漢軍改滿洲也和濟格爾本蒙古烏魯特人後隸正白旗漢軍遂爲何氏此蒙古改漢軍也莽鵠立本蒙古正藍旗人後擢入滿洲鑲黃旗此蒙古改滿洲也王國光先世爲滿洲姓完顏其父初爲明千總歸附後隸正紅旗漢軍乾隆十八年命其子孫及同族仍改入滿洲正紅鑲白二旗此改隸

之後繼又復改也佟國綱先世本滿洲後率明人來歸隸漢軍國綱請仍隸滿洲部議以佟姓官多應仍留漢軍國綱一支改隸滿洲此又或改或不改也似此者不可枚舉至於建立功勳或上承恩眷則有由內務府旗下擡入滿洲八旗者有由滿洲下五旗擡入上三旗者謂之擡旗然惟本支子孫方準擡其胞兄弟仍隸原旗又皇太后皇后丹闈在下五旗者皆擡旗丹闈者清語謂母家也又按乾隆七年奉旨清查八旗漢軍有願改歸原籍及移居外省者準其出旗爲民此又出旗之制也又辛者庫卽內管領下食月米之人八旗漢軍官員獲咎發入辛者庫則改隸內務府漢軍其子孫官至三品以上許奏請施恩仍歸原旗然亦有終隸內務府不復陳請者如百相國齡是也相國姓張氏又國初蒙古

有別立旗分者如布當爲烏魯特貝子與其叔父台吉恩格類各率所部同貝勒明安等來歸別立烏魯特蒙古一旗後以歸順蒙古等所行多違例不令別立蒙古旗俱分隸諸貝勒各佐領下

八旗氏族甚繁雍正十三年敕纂八旗滿洲氏族通譜共八十八卷大抵因地爲姓者多其著姓有瓜爾佳氏鈕祜祿氏富察氏舒穆祿完顏氏等二百九十六姓希姓有精吉氏薩爾都氏等三百四十姓又附載滿洲旗分內之蒙古姓氏有博爾濟吉特等二百三十三姓又附載滿洲旗分內之高麗姓氏有金韓李朴等四十三姓又附載滿洲旗分之尼堪似卽漢軍之稱姓氏有張李高雷一百六十餘姓凡公私文牘稱名不舉姓人則以其名之第一字稱之若姓然按白居易代朱忠亮答吐蕃東道節度使論結都離等書稱論公麾下虞集正心堂

記稱忙哥帖木耳爲忙侯至正間嘉定州重建儒學記稱鐵穆爾普華爲鐵侯蓋唐以來卽如是其命名或用

滿語或用漢文用漢文准用二字不准用三字以其與滿語混

也嘉慶間有旨禁止如肅改和申保爲和保清永泰爲永泰之類漢軍或繫姓或不繫姓祖

孫父子無一定

太宗天聰五年設六部以貝勒掌各部事設滿蒙漢承政三員參政八員啟心郎一員惟工部省蒙古漢軍參政六員崇德三年六部各留承政一員餘皆改參政有左參政右參政理藩院都察院亦稱承政參政順治元年改漢官銜承政爲尙書參政爲侍郎理事官爲郎中副理事官爲員外郎額者庫爲主事又初設他赤哈哈番筆帖式哈哈番改爲六品七品八品及無頂帶筆帖式

太祖設五大臣佐理國政 太宗御極八旗設總管政務大臣

一是爲八大臣

初設八大臣固三泰爲廂藍旗都統是八大臣似今八旗都統之職

又於八大臣

下每旗設理事聽訟大臣二是爲十六大臣

似今副都統之職

國初公侯伯之下無子男而別有五等世職蓋八等也乾隆元

年始定一二三等精奇尼哈番

舊世職爲昂邦章京

爲一二三等子一二

三等阿思哈尼哈番

舊世職爲梅勒章京

爲一二三等男一二三等阿達

哈哈番

舊甲喇

爲一二三等輕車都尉拜他喇布勒哈番

舊爲牛錄

騎都尉他沙勒哈番

舊爲半箇前程

爲雲騎尉

漢文臣無世職雍正間以大學士朱軾張廷玉蔣廷錫勤勞輔

弼特廓成例給予一等阿達哈哈番世襲漢世職蓋自此始又

八旗世職襲次完時有賞恩騎尉承襲罔替之例漢世職則否

乾隆三十二年以海澄公黃芳度合門殉節準於襲次完時照

八旗例給恩騎尉襲次罔替同時如將軍張勇趙良棟王進寶

提督孫思克陳福豆斌總兵高大喜等皆緣此推恩又殉節陣亡之張國彥等十七員軍功較著之惠應詔等十四員亦一體加恩此後漢官始有世襲罔替之例

附錄 本朝封爵自平西平南靖南諸王及靖逆靖海等侯以來未有以地名者惟黃梧來歸封海澄公準襲十二世以黃芳度守海澄鄭成功招之不從以此示獎也

國初直文館者掌文字學問優贍則賜號巴克什如達海剛林皆嘗賜此號武臣有戰功者賜巴圖魯號 太祖丁亥年取巴爾達城額亦都戰最力賜號巴圖魯此國史所載最在前者又按費揚古賜號翁科羅巴圖魯亦 太祖時事

按天聰間凡文臣前稱榜式者皆改稱筆帖式其 特賜榜

式名者仍稱榜式

榜式即巴克什清語滾舌音

太宗崇德元年改文館爲內三院曰國史院秘書院宏文院初亦沿承政之名後設大學士學士如希福於元年爲國史院承政尋授宏文院大學士是也順治元年增內三院學士各一員二年定爲正二品衙門以翰林官分隸三院稱內翰林國史院內翰林秘書院內翰林宏文院各院設大學士學士侍讀學士侍講學士侍讀侍講修撰等官如傅公以漸順治三年一甲一名進士授宏文院修撰呂公宮順治四年一甲一名進士授秘書院修撰其遷轉仍不拘本院之職如黃文僖機由宏文院編修遷中允侍講轉侍讀遷左庶子遷國史院侍讀學士馮文毅溥由國史院侍講授祭酒遷宏文院侍講學士轉秘書院侍讀學士之類三院大學士亦有遷改如傅公以漸由國史院學士擢秘書院大學士尋改國史院大學士是也十五年改內三院

大學士爲內閣大學士而繫以殿閣之稱仍兼各部尙書銜乾隆五十八年別設翰林院學士一員正一品其餘學士亦正一品

裁內閣學士侍讀學士等官康熙初元復內三院舊制設滿漢大學士其內閣翰林院俱裁九年仍改爲內閣大學士設翰林院十年復補授學士以下等官雍正八年定大學士爲正一品尙書爲從一品

內三院編修等官不必盡由科目如靳公輔以官學生考授國史院編修劉公兆麟以官學生授秘書院編修王公繼文以官學生授宏文院編修皆見本傳

殿閣舊制首中和次保和次文華次武英次文淵次東閣如張文和廷玉先授文淵晉文華改保和其後惟以初入之銜爲定不再更易行走班次不以殿閣爲先後乾隆十三年高宗以

四殿二閣未畫一旦中和殿名近時未有用者

中和殿大學士順治康熙時多

用因裁中和增體仁閣名是爲三殿三閣而先授之銜後仍改

易如由武英進文華是也行走班次除授後請旨

雍正三年張廷玉以尙書署大學士五年遜柱以尙書署大學士近則大學士無署任

初設內閣大學士無定員康熙間滿漢率用四員

按順治辛丑縉紳中和殿大學士三人

巴哈納馮銓金之俊

保和殿大

學士二人

額色黑成克鞏

文華殿大學士二人

蔣元恆

武英殿大學

士二人

胡世安

東閣大學士一人

李

文淵閣大學士一人

周據此則十一員矣文華有禮部尙書某武英有兵部尙書

某皆刊去姓名似其人甫去官尙未別簡故凡大學士皆尙

書也又內閣學士則文淵閣學士一人東閣學士一人保和

殿學士二人中和殿學士二人文華殿學士二人武英殿學士二人皆禮部侍郎銜內閣侍讀四人二滿二漢皆兼掌典籍事銜迨乾隆間增置侍讀十七員十四滿三漢今減漢缺一員又乾隆二十七年繕紳所載內閣有欽選御書及掌印典籍詰敕撰文中書舍人等銜而不分滿漢票籤之名又國初中書科中書列於都察院衙門有掌印中書舍人掌科中書舍人餘與今同

舊制無協辦大學士雍正七年以禮部尙書陳元龍左都御史尹泰事聖祖有年年近八旬特授爲額外大學士其後往往用至六員或仍增置一二員乾隆十三年始定滿漢大學士各二員協辦大學士滿漢各一員或二員仍無定然數十年來大率滿漢各一員文宗御極之初滿大學士穆彰阿耆英同日

落職 命戶部尙書賽尙阿協辦大學士而琦善先以協辦大學士爲陝甘總督故滿洲有兩協辦然未及三月賽卽揆正席大學士陳文貞廷敬以康熙四十九年致仕辛卯六月張文貞玉書薨 命陳復起視事凡內閣章疏列名必書予告二字此旣予告而復起者又康熙五十三年大學士溫達致仕明年以其人尙康健命仍任大學士此已致仕而仍命復位者近時翁公心存祁公篤藻病退後 特旨起用皆以大學士銜任尙書大學士兼總督者帶大學士銜由協辦大學士任總督者不帶協辦大學士銜此乾隆十三年例蓋協辦閣務之員旣外簡固無所爲協辦也近則協辦任總督帶閣銜如故

雍正間徐文穆本白公潢以協辦授大學士嗣後大學士員缺率以協辦大學士補授其不由協辦得者爲王文端杰董文恭

誥道光癸巳盧文肅蔭溥予告以吏部尙書潘文恭世恩補授亦不由協辦時協揆爲阮文達元

舊制大學士獲咎去官其員缺卽奉 旨簡授如告休病歿則

一月後請 旨簡授以示篤念舊臣之意

乾隆十三年上諭

道光間大

學士王公鼎歿至乙巳始以協辦大學士卓公秉恬補授空缺幾三年爲前此所未有咸豐四年大學士祁公寯藻以病乞罷卽日以賈公楨爲大學士亦與曩制異

滿蒙漢軍大學士不必盡由翰林出身漢大學士 國初亦皆特簡嗣由吏部進本惟翰林出身者始開列亦有以資勞入閣不由翰林者如趙國麟康熙己丑進士乾隆四年授文華殿大學士孫文靖士毅乾隆辛巳進士五十七年授文淵閣大學士費文恪涇乾隆癸未進士嘉慶十二年授體仁閣大學士章文

簡煦乾隆壬辰進士嘉慶二十二年授文淵閣大學士皆不由翰林出身頃彭公蘊章道光乙未進士咸豐六年亦授大學士內閣學士爲翰詹應升缺漢官京堂之曾任編檢者始另單開列惟乾隆間尹壯圖張若淳嘉慶間王汝璧未任編檢而授閣學

順治辛丑縉紳所列六部官制有與今異者具錄如左

吏部尙書二人左右侍郎各二人

馮博以右侍郎兼內翰林侍讀學士

戶部尙書二人左侍郎二人右侍郎一人

又二行關名

督理漕糧駐

劄淮安右侍郎一人督理京省錢法右侍郎一人總督倉場左

侍郎二人

一漢一滿

又通州坐糧廳管寶泉局監督大通橋通昌草

廠京倉

左翼西倉右翼西倉通倉

西倉中南倉

德州管倉臨清管倉徐州管倉

淮安管倉鳳陽管倉崇文門稅課河西鈔關臨清鈔關淮安鈔

關揚州鈔關蕪湖鈔關浙墅鈔關北新鈔關西新鈔關九江鈔關各差皆隸戶部皆漢人

禮部尙書二人左侍郎二人

一兼內翰林院侍讀學士

右侍郎二人

一兼內翰林院

侍讀學士

兵部尙書二人左右侍郎二人督捕左右侍郎各一人郎中以
下亦有兼督捕銜者

刑部尙書二人左右侍郎各二人其北直江北江南山東山西河南陝西湖廣浙江江西福建廣東廣西貴州雲南恤刑之差隸刑部

工部尙書二人左侍郎二人左侍郎管右侍郎事一人右侍郎二人司員內有督理兩窯各省織造總管內務府副理事銜又另有管理街道管寶源局管琉璃黑窑管臨清磚廠提督古北

抽分管理三山管理衛河提督通惠河道提督張秋北河提督
潘家桃林抽分管節慎庫提督徐淮中河提督儀真南河提督
南旺河道泉閘提督夏鎮閘提督江南蘆政提督龍江瓦屑閘
提督蕪湖抽分提督杭州抽分提督荊州抽分提督清江造船
等差

雍正初設會考府以王大臣領之糾察六部清釐錢糧出入之
數二年裁省

舊制盛京止設戶禮刑工四部滿侍郎及郎中等官康熙三十
年添設兵部侍郎科臣王原祁因疏請倣明南京例并添設漢
侍郎以下官下九卿科道議不行

國初勅設兵部督捕衙門滿漢左右侍郎二人滿左右理事官
二人漢協理督捕太僕寺少卿二人旋改左右理事官滿漢郎

中各一人滿洲員外郎七人主事四人漢員外郎一人主事六人分理八司治八旗逋逃及京城盜賊緝捕之事凡三營將弁皆隸焉康熙辛未以三營隸九門提督而督捕專司逋逃之事國初有議政處故設立議政王大臣議政大臣二十有四雍正間設軍機處承旨屬軍機大臣而滿大學士尙有兼議政大臣銜者乾隆五十六年停止同治初用垂簾舊制設議政王與軍機大臣同承旨旋裁

太宗時改蒙古衙門爲理藩院治蒙古諸藩部事案冊向用滿蒙文無漢字康熙二十八年從馬齊請兼用漢字

按順治辛丑縉紳有禮部尙書掌理藩院事一人今另設左

右侍郎協理院事各一人今無協理字所屬有理事僉堂皆滿人

院判知事皆漢人今皆無

康熙十三年 命步軍統領提督九門事

國初卿寺諸官強半裁省吏科都給事中朱徽清請酌職任繁簡量行增設得 旨交部會議有復設者詹事太僕等官是也有不復設者尙寶等官是也至乾隆十三年復加裁併而釐正之

國初左都御史右副都御史之下有左僉都御史一人六科有都給事中二人一滿一漢左右給事中各一人皆漢人康熙元年後裁左右給事中十二員六科共留十二員改都給事中爲掌印

按順治辛丑縉紳十四道五城已與今制同惟河南道有協理一人

國初置都察院滿漢掌院事左都御史各一人協理院事左副

都御史各二人左僉都御史一人先用漢軍後漢軍漢人參用
監察御史四十人皆漢人滿人則曰理事官副理事官後皆改
監察御史康熙初裁臺省官滿洲監察御史二十三人漢監察
御史二十四人又置漢軍御史六人

以六部郎中遷補

此見居易錄據

順治辛丑縉紳其時尚有協理院事右參政一人

六科隸通政司明制也迨省垣積重勢凌六卿與通政無復關
白 本朝以六科隸都察院自雍正時始

按給事一官名肇於漢厥後與中書門下稱兩省皆居禁垣
而御史則謂之臺臺自爲臺省自爲省也明初分科以省知
六部之事罷門下省不設而六科專主封駁 國初會典開
載該科所奉 旨意有灼見未便之處許封還執奏部院督
撫本章有情理未協者俱得駁正題參是舊制猶以封駁爲

職不任以他事也雍正元年以六科內升外轉一事奉旨
歸都察院管此後科臣循照臺例一切城倉漕鹽等差與御
史一體開列臺省并爲一官與列代之制異矣當改例時給
事中王澍崔致遠康五瑞奏言六科有稽察各部院之責不
應隸都察院管轄不報旋調三人爲員外郎又按國初會
典開載凡內閣交出密本由該科掛號卽將各原封送各該
部是從前密本卽今之奏摺未有從內閣徑下者至順治末密本
有不由科臣徑由內閣發部科臣不得卽見者見順治十七
年御史季振宜疏其後習以爲常亦與前代中書門下兩省
更互校驗之意不同

雍正初設稽察宗室監察御史二員以宗室爲之尋省

御史向有坐道協道之分坐道乃空銜不理本道之事協道以

次遞遷沿明制也乾隆間定爲二十八缺分理十五省事以事之繁簡分員數之多寡并稽察部院各衙門事裁坐道協道名目

向例部院官每年二月八月內升外轉各一員內升以太常寺四譯館鴻臚寺太僕寺各少卿及府丞等官外轉則掌印給事中以副使用給事中監察御史以參議用吏部郎中轉副使員外轉參議主事轉僉事

舊制主事準考科道順治三年簡新進士十人分用六科康熙二十年定不準用大員子弟四十四年定翰林考補科道中行評博等官由知縣升者準考雍正四年準內閣侍讀考科道五年定六科由各道升用是年令兼用貢監十三年定仍專用正途乾隆九年定御史缺出翰林一人部屬二人帶領引見嘉慶

十一年定翰林部屬輪次引見十一年定廕生出身之部屬準考

順治九年增設五城漢軍理事官此巡城之始也十年定五城滿洲漢軍漢人御史各一人十八年各增滿員一人康熙十五年定爲一年一換雍正元年定每城二員滿漢各一五年令給事中一體引見乾隆間令大宛人迴避三十九年漢軍停開列雍正間御史外授道府有仍帶御史銜者又康熙間遜柱由筆帖式累遷至郎中授御史遷翰林院侍講學士仍兼御史事孫在豐已擢侍郎仍兼翰林院學士銜此皆與後來官制不同滿給事中舊制以員外郎升用雍正十二年從副都御史鄂爾賽請以御史升用如漢給事中例

康熙三十九年行取以科道用者一時無缺可補 命補額外

御史隨九卿議事亦許陳奏

御史舊有五品六品之分試俸不試俸之異乾隆十八年定給事中爲正五品御史俱爲從五品不必試俸

順治二年差御史催漕此巡漕之始其後兩次停止雍正七年復以御史視漕一至淮安一至通州此分巡南北之始嘉慶以後停止

國初踵明制各省有巡按御史各府設推官以左右之康熙二年皆裁從左都御史阿思哈請也巡按之外有巡江巡鹽巡漕屯田茶馬察荒巡視湖河巡視臺灣巡視黑龍江船廠巡視十庫巡視光祿諸差皆隸都察院自後或裁或改惟巡漕則嘉慶初尙有之旋裁又後設之查崇文門稅務道光間裁查三庫則道光二十年後裁雍正間又有觀風整俗使宣諭化導使營田

觀察使旋即停止若歸化綏遠兩城所轄皆蒙古地今每五年以部院蒙古人員引見用一員往查不屬御史也

按國初巡按直隸一江南江安徽甯池太廬鳳一蘇松常鎮淮揚一江西一湖廣武岳長寶辰常衡永一漢黃鄖襄荆安德一山東一山西一河南一陝西一福建一四川一廣東一廣西一雲南一

以上五省皆兼管鹽法

貴州一又巡按直隸督理京

通二倉兼管通惠河道轄河間等府天津等衛一巡按陝西督理甘肅一鎮兼攝臨洮鞏昌府學政巡歷西甯河西衛所一巡按直隸督理長蘆鹽課兼河道驛傳轄山東河南開歸彰衛四府一巡按江南督理兩淮鹽課兼鹽兌轄江西湖廣河南汝甯等處一巡按浙江督理兩浙鹽課兼海防轄蘇松常鎮徽五府廣德一州江西廣信等處一巡按山西督理河

東鹽課陝西大小二池轄河南懷慶等處汝州一州潼關衛
一巡按陝西督理洮州西甯茶馬轄川湖下川東安綿龍安
保甯重慶夔州等處一

按雍正間別有巡察等差非專屬御史如勵宗萬管理山西
巡察則翰林院侍讀也浙江觀風整俗使王國棟則光祿寺
卿許容則前浙江布政也史貽直爲陝西宣諭化導使則兵
部尙書也又按康熙十九年 命刑尙魏象樞吏侍科爾坤
巡察畿輔是巡察之名不始於雍正矣又觀風整俗使亦設
於閩廣湖北等省以奸民煽衆故也

翰林院六部保送御史定例先以策論試之亦有免考試卽引
見取 旨者保送人員以六十五歲爲率過此不準嘉慶四年
例

都察院受內外訟訴京畿道主其事命案及事關重大者奏聞
候 旨餘則咨交各省訊辦

養吉齋叢錄卷一終

養吉齋叢錄卷一

古

養吉齋叢錄卷之二

賜進士出身雲貴總督翰林院編修臣吳振棫纂

詹事府詹事庶子洗馬中允贊善等官向沿明制兼翰林院讀講學士侍讀侍講修撰編修檢討等銜乾隆五十四年停止又國初有兼掌詹事府者如居易錄所載禮部尙書張公英兼掌翰林院詹事府事又康熙四十二年高士奇進御製詩集表文結銜作內廷供奉禮部侍郎兼翰林院學士此侍郎兼學士銜也

天聰三年命儒臣分爲兩直巴克什達海同筆帖式剛林蘇開顧爾馬渾託布戚翻譯漢字書籍此卽日講之義巴克什庫爾禪同筆帖式吳巴什查素喀胡球詹霸記注本朝政事此卽起居注官之義順治十二年設日講官十七年詔翰林各

官直宿景運門備顧問掌院哲庫納王熙請分日入直並以讀講學士至編檢每日八員輪直此曩時日講之制康熙九年復設起居注官國初有起居注後裁輪直日講以掌院學士翰林等官充補滿四員漢八員自後屢有增損此以起居注兼日講也熊孝感自陳疏云康熙十年二月充經筵講官三月充日講官五月充起居注是其時日講與起居注爲分職二十五年停日講而起居注官仍繫日講二字於銜上五十七年裁起居注事歸內閣惟令翰林五員於聽政時輪直班行雍正元年復設日講起居注滿六員漢十二員乾隆嘉慶間兩次增滿官四員於是日講起居注合而爲一以翰林詹事坊局官原銜兼充皆由簡派惟滿漢掌院學士及詹事得坐充日講起居注官

按舊縉紳及當時所刊官書講官結銜皆作日講官起居注

經筵日講官起居注不作日講起居注官也私家著撰結銜亦然蓋與今異

翰詹兼日講官如升任別衙門則不復兼充而汪公由敦以常少許公王猷以閣學仍兼充特旨也

起居注衙門在太和門西廊新授講官到任僅一至焉朝廷有大政令依舊式書之月爲二冊封印時諸官蟒服補褂齋繕定清冊用翰林院印鈐縫以鐵匭局鐫封識至午門具奏旨下則送內閣藏之大庫

按起居注前序後跋兩掌院屬講官之能文者撰之除夕筵宴派二講官與宴卽是年撰文者

日講官二十缺滿八缺漢十二缺以漢講官修起居注也滿講官則俟稿定後專司繙譯正本又兩掌院學士以經筵日講帶

起居注銜是以滿講官實止七缺漢講官實止十一缺以十一人分修五箇半月之書餘月之書由編檢中派出協修先是講官缺出列名具本請旨有協修者注於名下其後改爲俸深十員引見之例

國初以大學士知經筵事後定經筵講官滿漢各六人滿講官以內閣學士掌院學士讀講學士詹事少詹事及尙書侍郎左都御史副都御史通政司大理寺卿之由內閣翰林升任者以原銜兼充漢講官兼充者有祭酒而無通政大理餘皆與滿官同若大學士則不充經筵講官故楊繩武撰陳文貞廷敬神道碑有故事閣臣不進講經筵而上仍以命公之語自徐公元文熊公賜履張公英相繼以尙書擢大學士仍與兼充後遂沿爲成例

乾隆四十一年建 文淵閣以藏四庫全書置領閣事二員以大學士協辦大學士翰林院掌院學士兼充直閣事六員以科甲出身之內閣學士詹事少詹事讀講學士兼充校理十六員以庶子讀講洗馬中贊修撰編檢及科甲出身之內閣侍讀等官兼充又設檢閱官八員以科甲出身之內閣中書兼充派內務府大臣一員兼充提舉閣事司啟閉又充直閣校理等官者如升至不應兼充之官卽開缺惟紀昀陸錫熊陸費墀初兼直閣事後洊升至侍郎尙書仍兼充戴衢亨以尙書特授直閣事皆 曠典又章寶傳劉謹之劉錫嘏以給事御史兼校理蓋三人本 四庫館提調故預選非定制也

國初滿掌院學士缺出以詹事少詹事讀講學士祭酒庶子暨科甲出身之太常寺卿光祿寺卿太僕寺卿通政司副使大理

寺少卿鴻臚寺卿太常寺少卿太僕寺少卿內閣侍讀學士爲
應升侍讀侍講洗馬司業暨科甲出身之通政使參議光祿寺
少卿鴻臚寺少卿科道等官爲其次應升漢掌院學士缺出以
詹事少詹事讀講學士祭酒爲應升庶子侍讀侍講爲其次應
升由吏部開列具奏康熙二十八年 諭大學士翰林掌院一
官職任緊要必文學淹通衆所推服者始克勝任凡翰林撰擬
之文亦須掌院詳加刪潤然後成章聞明代大學士有兼管掌
院之例大學士徐元文著兼管翰林院掌院學士事自是之後
皆以重臣兼領缺出恭候 特簡如奉 旨令開列以大學士
各部尙書侍郎繕單進呈

按掌院學士初爲專官故定爲一品而亦有兼領者如順治
十五年庫勒訥以禮侍兼掌院學士之類以大學士兼領則

始於徐元文

教習庶吉士 國初以內院學士爲之侍讀等亦間有與者其
後以掌院兼其職如順治十八年折庫納王熙皆以掌院兼教
習也康熙九年專設翰林院歷科皆以掌院學士領其事而內
閣學士時參用焉至六十一年辛亥科始以工部尙書陳元龍
領教習事其後尙書侍郎內閣學士之不掌院事者並得開列
請派其始或一二人或三四人謂之大教習乾隆以後皆用滿
漢各一員小教習則由掌院選派資深翰林爲之始於康熙三
十三年以教習滿蒙庶吉士也五十三年漢庶吉士始派小教
習雍正八年停止乾隆十年復舊制又 國初有命教習武進
士者如遇必隆鼐拜皆嘗爲之

附錄

鄉會座師投帖稱門生後避師生嫌用名帖不書稱

謂惟教習以特派故用門生帖乾隆間程文恭景伊教習乙

未翰林以平生未掌文衡

僅作戊辰同考一次

屬同館改用名帖自此

遂成定式又康熙癸丑徐秉義授編修其母弟掌院學士徐

元文爲教習具疏題明特免秉義赴館癸未查慎行選庶吉

士時掌院學士教習揆敘爲慎行受業弟子特免慎行赴館

翰林官結銜舊例若經筵日講則書於本官之上若兼官則書

於本官之下其教習庶吉士及充各館總裁纂修等官則又書

於本官及兼官之下按掌院兼禮部侍郎銜詹事庶子等官兼

翰林銜已於乾隆間裁去今經筵講官及日講起居注官文

淵閣直閣事校理結銜在本官上其餘總裁纂修及一切差使

俱繫於本官下如舊例云

康熙間特開書局於

武英殿實爲詞臣纂輯之地乾隆以後

書館盛開 武英殿專司刊校未嘗廢置刊行經史子集謂之殿板向以親郡王一人領殿事而設總裁提調總纂纂修協修等官其下則爲校錄之士收掌之員若剞劂裝釘工匠尤夥道光二十年後以經費支絀刊書甚少僅存其名而已

順治十八年縉紳內閣有翰林院提督四譯館太常寺少卿楊義是時常少一官另有人此當是兼銜其時四譯館亦歸內閣也

順治十三年以翰林官陳爌等十八人外轉遇缺卽補是時定制詹事以布政使用食正二品俸少詹以布政使用侍讀學士以按察使用侍讀中允以參政用編檢以副使用十六年定議侍讀侍講以參政用修撰以副使用編檢以參議用迨康熙二十八年編修李瀍等始外用知府三十七年以吳涵請復用檢

討劉涵爲知府雍正乾隆間屢有編檢才堪道府者大學士掌院揀選帶領引見之諭嘉慶五年定開坊之翰詹等官京察記名以道府用編檢以同知直隸州用尋改資俸已進前二十名者簡道府道光元年定未進二十名亦簡道府

按康熙二十七年擢在籍檢討衛旣齊爲山東布政使四十年擢庶吉士董新策爲甯夏道嗣又擢庶吉士徐景曾饒鳴鎬爲知府皆異數又順治己丑會試二甲授參議三甲授知府釋褐卽官四品時兩廣甫定開國之規模也

國初庶常散館間改科道以編檢改科道自康熙二十九年馮雲驥湯右曾等六人始

雍正元年命於俸淺編檢內擇滿漢各二員主定稿說堂之事此清祕堂辦事翰林之始其後人數稍增有奏辦協辦之目

以積勞當得京察一等可外補故競趨之也

附錄 清祕堂本名東齋房 高宗幸翰林院賜集賢清祕

額 御製有清祕堂偶題一詩遂更今名堂後爲成樂軒石刻董其昌成樂軒記堂前亭曰瀛洲亭池曰鳳凰池

順治間改分省館選舊例見漁洋文畧雍正元年癸卯漢軍及河南四川無館選二年甲辰蒙古及山西河南陝西湖南四川廣東廣西雲南貴州無館選四年太常寺少卿李鍾戡上疏請廣儲才之路 敕部議行五年丁未各省始俱有館選今每科分省館選自此始

附錄 館選後館人送認啟單凡前一科以上授職編修檢討及未散館之庶常其人尙在者無論在本衙門在別衙門在原籍在外任均列名而以大學士冠於首彙刊一紙名曰

認啟次第則序科不序爵惟大學士序爵不序科至奉旨
由別衙門改授館職者如曾拜前輩亦得列名卽附於是科
庶常之末其未拜者不列

按雍正癸卯館選六十一人

茶餘客話作五十六人

甲辰館選四十二

人

茶餘客話作四十人

其時考試詩文之外仍命九卿保舉然或館選

或用爲主事知縣不盡憑保舉也

國初庶常隸內宏文院專設翰林院後乃隸翰林雍正十二年
撥給官房爲庶常館向例散館後始授職雖傳臚亦然惟雍正
元年二甲一名張廷珩卽授檢討十一年二甲一名張若靄卽
授編修皆未選庶常而授職者

按二甲授檢討者張廷珩外康熙間則錢金甫乾隆間則陳
兆崙夏之蓉周長發三甲授編修者康熙間則李鎧錢中諧

曹禾乾隆間則董泰或召試詞科或特旨拔用故未依

甲第

雍正元年新進士內有記名十七員奉旨傳問有願在各館効力及在內官學學習者令自陳至三年四月授景山官學教習夏之芳爲編修姜穎新黃岳牧陸宗楷爲檢討此未選庶常而以行走勤慎授編檢者

散館改用他官卽不得復入翰林惟張逸少由庶常散館改知縣遷秦州牧以父大學士張玉書奏乞內用改授編修又翰林已改御史而復入詞館者如康熙間彭始搏以會試分房持正仍授檢討出爲外任而復入詞館者乾隆間山西布政使朱珪特授講學嘉慶間廣東按察使邱庭瀛請終養特授讀學皆殊數至翰林已任大僚緣事罷官復賞給編檢者則又棄瑕錄用

之意也

翰詹衙門由他官改授者如錢以塏以左通政授少詹事趙殿最以按察使授少詹事揆敘以二等侍衛授侍讀康五瑞以給事中授侍讀張允欽陸錫熊俱以郎中授侍讀王士禎以郎中授侍講高士奇以中書授侍講王原祁以給事中授中允王延年以國子監學正授司業黃鉞以主事授贊善杜鎮陳聶恆程晉芳以主事授編修勵杜訥以州同授編修魏學誠陳厚耀以中書授編修趙申季以知縣授編修尼滿以筆帖式授編修王懋竑以教授授編修陳學海以御史授檢討廖必琦以主事改庶吉士侍朝以國子監丞改庶吉士

進士論甲第授修撰編修檢討無升降也惟順治九年擢編修程芳朝蔣超爲修撰檢討李蔚沙澄傳作霖劉澤芳石申爲編

修又順治己丑姜元衡以編修降檢討

嘉慶六年散館改部屬者三十五員改知縣者十五員嗣以滿洲及邊省翰林人數甚少復以改用之二甲進士吳其彥張惠言陳壽祺李瑚吳榮光花杰李端李象鵠王鼎楊世英胡大成仍授編修三甲進士貴慶仍授檢討

錢塘梁啟心乾隆己未庶常以父老侍養於家其弟詩正方以侍郎侍從 禁廷因卽家授啟心編修未散館而授職康熙間王蘭生以庶吉士充武英殿總裁皆異數

順治九年題準每科分省選取庶吉士四十人

直隸江南浙江

湖廣山東河南四人山西陝西二人廣東一人

以二十名讀漢書二十名讀滿書康熙

時例庶常年四十五歲以下者讀清書又甲辰丁未庚戌三科庶吉士皆習清書癸丑始分習清漢書其時蓋甚重此選雍正

以來習清書者漸少然每科尙有十四五人十七八人高宗以邊省及北五省館選人少聲律未嫻旣習清書漢文益就荒落散館時或以清書優等留館迨試以詩賦往往列入下等改官因命雲貴川廣五省庶吉士不必習清書直隸山東河南山西陝西等省視其人數在三四人以上派一二人江浙等省人數在五六人以上派二三人率以三十歲以下者充之或丁憂告假散館時年齒已長仍準改習漢書每科通計在十人內外甯缺無濫道光戊戌科以後不復派清書矣清書散館分一二三等

康熙間庶吉士讀滿書者每員頒給遼金元史洪武寶訓大學衍義日講四書解義等書旋停止

雍正初元嘗以三等侍衛依都額眞伊爾登爲國子監祭酒此

亦僅見之事

中書舊由考取乾隆三十三年御史蔣綸奏稱中書考試無定期士子無從按期齊集且中書官階在主事之下知縣之上而考試以一論一詩得之未免視爲捷徑請於每科新進士以庶吉士主事知縣三項分用外添用內閣中書一項則名器益昭公愼云云下部議準蓋行之數十年道光間新進士用中書者少缺員待補復開考取之例

按乾隆五十五年諭落卷內錄取中書學正學錄之例概行停止是其時中書又有由落卷挑取者

附錄 近日公私文字皆稱內閣中書惟縉紳內尙存舍人字耳古夫于亭雜錄云唐宋以來中書省爲宰相之署今內閣中書舍人尙沿古中書舍人舊名若止云內閣中書則是

以古署名爲官銜踳誤甚大此不可不知也故附書於後

國初官制與今異者通政司除滿漢通政各一人外有理事左右通政各一滿人左右通政各一漢人參議亦不止二人大理寺少卿有左右有寺副左右寺正今稱寺丞評事舊分左右鴻臚寺有寺丞有司賓序班有行人司正宗人府僅有府丞一啟心郎一經歷一餘官尙未設也

院寺舊無員外主事之名後翰林院起居注添設主事四員太僕寺員外郎八員皆以滿洲人爲之見居易錄此康熙時制也國初以諸王貝勒管部院事設啟心郎一員順治十五年裁惟宗人府如故今宗人府亦無啟心郎

按張文貞所撰李文襄墓誌裁啟心郎非十五年似尙在前一二年也又紀文達內務府郎中姚公墓表言堂郎中爲上

下之樞紐職任繁重似 國初六部之啟心郎觀此則啟心郎之職掌可知矣又順治十八年 命前此啟心郎改主事者仍以四品用是當時啟心郎爲四品秩今內務府有堂郎中堂主事六部惟堂主事掌清文稿片冊檔

順治八年以索尼總管內務府事見本傳然內務府之名蓋舊有之非自順治始也

國初設御用監順治十二年改設銀庫緞庫衣庫皮庫二十八年設茶庫蠶庫六庫隸內務府廣儲司

總管內務府大臣清語稱包衣昂邦卽包衣大張文貞云包衣大之職前代所未有自乘輿服御以及飲食日用之節出入起居罔不綜理蓋如周禮職內職歲掌舍掌次遷人冪人諸事總於天官之屬者皆得領之任繁實重與外朝迥異

明制以內監治宮禁事外點關鹽織造等差爲害甚大本朝
設內務府總管以大臣兼掌無定員下設廣儲司會計司掌儀
司都虞司慎刑司營造司織染局有郎中員外主事各員鹽政
稅關織造諸差卽於郎中等員內簡派較前明立法爲善

順治初設御馬監十八年改爲阿敦衙門康熙十六年改上駟
院順治初置鞍樓十一年改兵仗局十八年改武備院若奉宸
院康熙二十三年始設國初爲上林苑也此三院舊屬內務
府管理無定員乾隆十四年命三院卿各定爲二缺以侍衛
內務府各一員分用

國初鑾儀使管衛事鑾儀使協同管衛事各一人皆滿人協同
管衛事都督同知二人皆漢人餘官與今同駕座舊稱駕庫今
分金玉象革木五輅舊惟玉輅輦大輅輦小馬輦舊有

品級山整儀尉篋頭整儀尉今無又侍衛舊有欽選侍衛一等
蝦及隨蝦學習二三四品服俸名目今爲一二三等侍衛
登聞院在西長安門外街東舊設滿漢科道各一員雍正二年
統於通政司主受訴訟之事 國初劉公餘佑請革帶地投充
疏有 御狀鼓狀通狀紛爭無已語鼓狀卽登聞院之狀通狀
通政司之狀也其後控訴者赴都察院及提督衙門外藩則赴
理藩院無所謂鼓狀通狀矣

國初沿明制設教坊司隸禮部與太常分掌樂事有奉鑾一員
左右韶舞二員左右司樂二員協同官十五員又有俳優色長
歌工樂工凡一百三十五人司宮懸大樂又宮內行禮燕會用
領樂官妻四人女樂四十八名序立奏樂衣綠綬單長袍紅綬
月牙夾背心用寸金花樣金髮簪青帕首順治十六年止後復

用裁女樂改用太監

舊時本有隨鑾細樂太監十八名

雍正七年改教坊司爲

和聲署乾隆七年設樂部凡太常寺神樂觀

乾隆八年改神樂觀所二十年改神樂署

所司祭祀之樂和聲署掌儀司所司朝會燕饗之樂鑾儀衛

所司鑾歌鼓吹前部大樂

卽大罕波皆隸焉

京師十三倉曰祿米南新舊太富新興平在朝陽門內曰海運

北新在東直門內曰太平在朝陽門外

均初建國

曰本裕在德勝

門外曰清河

以上康熙間建

萬安在朝陽門外曰儲濟裕豐在東便門

外曰豐益在德勝門外安河橋

以上雍正間建

又通州兩倉專儲白糧

備京師一二品大員俸米自行到通領運又圓明園兩倉備宮

內外食官米者領用共十七倉故部尙有稽察十七倉之差

舊時倉場皆兼任如康熙三十三年以戶部倉場侍郎常書兼

翰林院掌院學士又派教習庶吉士四十六年以左都御史富

甯安兼倉場侍郎明年爲禮部尙書仍兼倉場事

禁城以內諸王及滿洲文武大臣前鋒統領護軍統領內務府

大臣輪流直宿謂之六大班自嘉慶六年定

侍衛宿衛以乾清門內右門

神武門

甯壽門爲內班

太和門爲外班亦六班宮內及圓明園有管激桶大臣官員

兵丁謂之火班

火班見上諭

舊制八旗每旗設十五缺爲十五善射清語謂之托佛霍托無

論王公文武大臣侍衛官員拜唐阿兵丁閒散宗室概行揀選

引見而拜唐阿兵丁列班在後挑取極難乾隆三十九年 命

專以拜唐阿兵丁閒散宗室揀選引見又於上三旗內每旗別

設十五缺八旗王公大臣侍衛官員善射者報名本旗都統列

名以請 上親閱取定若干人或馬射或步射或鵠射隨其所

長不限一格清語步射曰搭扑他拉鵠射曰通恩搭扑他拉騎

射曰呢木呀皆有定員凡十五善射皆戴翎又武殿試於紫
光閣閱馬步箭先期派十五善射爲先導謂之引射

太醫院院使院判御醫吏目醫士分班侍直給侍宮中者曰宮
直給侍外廷者曰六直習業舊分十一科後以痘疹歸小方脈
而咽喉口齒并一科是爲九科然近世無良醫供官者尤多庸
猥王公大臣及草澤醫有精脈訣者每召入診視道光間九
江道魏襄知醫特轉京卿亦命之視疾也

欽天監舊用西洋人推算有爲監正監副者道光間高拱宸等
或歸本國或病歿時監中已諳西法無須用彼土人遂奉旨
停止西洋人入監宣武門內迤東城根有西洋天主堂康熙間
修建極宏麗十九年己酉亦命拆毀咸豐間和議既定復建
此堂

按順治間縉紳管欽天監印務者敕賜通元教師加通政司使用一品頂戴大西洋人湯若望其左右監副僅二人皆漢人有五官保章正今稱五官正司祿司書又有回回科博士而無司晨漏刻時憲諸科

附錄 明萬曆中西洋人利瑪竇與其徒湯若望羅雅谷等奉天主教來游中國極言授時歷之誤當時未之信也至

國朝順治元年若望進渾天星毯地平日晷窺遠鏡各一具及輿地屏圖請依西洋新法推算二年仲秋朔日食若望先期進時刻分秒起復方位至期令廷臣公同測驗諸法俱舛而新法獨合於是令若望用新法修時憲祿時天下初定海禁尙弛西洋人來者愈多散居中國於濟南淮安揚州鎮江江甯蘇州常熟上海杭州金華蘭谿福州建甯延平汀州南

昌建昌贛州廣州桂林重慶保甯武昌西安太原絳州開封等處共建天主堂三十餘所入其教者厚與金帛無藉之徒羣相依附其燄遂熾有歛民楊光先者著闢邪論又著孽鏡中星說選擇議摘謬十編痛詈新法之非總名其書爲不得已又以若望等邪黨惑衆包藏禍心具請誅邪教疏康熙三年赴部投遞下吏部會審若望得罪革職四年以光先爲監副光先五上疏辭職不准尋升監正西法中廢後西洋人南懷仁復具疏訟冤又革光先職用南懷仁而西法復行至雍正間嚴海禁毀各處天主堂止留京師一處俾西人修厯者居之有潛來內地妄稱傳教者皆嚴繩以法歲月旣久禁防稍疏迨道光咸豐以來傳教者益紛紜疆吏不敢過問矣

養古齋叢錄卷二終

養吉齋叢錄卷之三

賜進士出身雲貴總督翰林院編修臣吳振棫纂

宗學覺羅學東西城分左右翼雍正間派編檢二員爲宗學教習乾隆間停嘉慶間改用進士舉人爲教習咸安宮學在內西華門內爲八旗官員子弟讀書處總裁以滿漢翰林各二員充其後由掌院派充滿二員漢四員按日稽課西配殿讀滿洲書者則滿總裁稽之

順治元年設八旗官學康熙二十三年設琉球官學二十四年設景山官學五十二年設算學於暢春園之蒙養齋雍正六年設俄羅斯學即會同館設學教之七年設咸安宮官學九年增設國子監南學乾隆三年於欽天監附近設算學其唐古忒學歸國子監回緬官學總管二人以內務府司員充回子教習二人以內務

府回子佐領下回子充緬子教習二人以緬甸國人充緬子教習五年期滿則歸其國先期雲貴總督選該國夷人至京更替粘竿處卽上虞備用處侍衛四十員凡駕出入司扶輿執燈之事又司庫一員內務府派掌粘竿釣竿及一切戲具鷹狗處調犬以八旗人爲之調鷹及雕之屬以西八城回子爲之道光間裁國初督撫兼右都御史者總督浙江一人總督兩廣一人兼左副都御史者總督漕運巡撫鳳陽等處一人兼右副都御史者總督陝西三邊四川等處一人總督江南江西一人總督福建一人總督湖廣一人總督雲貴一人總督河道提督軍務一人提督操江兼巡撫安徽甯池太廣一人巡撫直隸保定眞順廣大紫荆關提督軍務一人巡撫山東督理營田提督軍務一人提督雁門等關巡撫山西一人巡撫河南提督軍務兼理河道

一人巡撫陝西贊理軍務一人巡撫江西提督軍務一人巡撫
福建提督軍務一人巡撫甘肅贊理軍務一人總理糧儲提督
軍務巡撫江甯等處一人巡撫湖廣提督軍務一人提督軍務
撫治鄖陽等處一人巡撫四川提督軍務一人巡撫廣東提督
軍務一人巡撫廣西提督軍務一人巡撫雲南兼建昌畢節東
川等處督理川貴兵餉一人巡撫貴州提督軍務督理湖北川
東等處一人巡撫鳳陽提督軍務兼理海防一人兼右僉都御
史者巡撫順天河間永平三府宣府鎮地方密雲等關提督軍
務一人巡撫延綏贊理軍務一人巡撫甯夏贊理軍務一人巡
撫浙江提督軍務一人巡撫偏沅提督軍務一人

乾隆二十七年定總督兼御前大臣內大臣等銜在將軍上者
班次列將軍前大學士任總督者班次亦列將軍前三十二年

以總督爲從一品將軍亦當爲從一品使文武統率大員品制相當

舊制總督巡撫隨時奉命掛右都右副都右僉都御史銜無定員非地方官也有捐助賑濟完漕等事應加級者得加侍郎尙書官保銜見順治十七年孫尙書廷銓用人四事疏又雍正元年加川陝江南總督兵部尙書以川督控制番羌江督統理三省地大兵多故加以重銜資鎮撫也二年加兩廣總督孔毓珣河道總督齊蘇勒兵部尙書以不附隆科多年羹堯也是加銜並非恆例乾隆以來總督加兵部尙書銜巡撫加兵部侍郎銜初授由部題請皆允行而以二品頂戴授總督者仍兼侍郎銜

附錄 紀文達所跋順治十七年縉紳各省不列總督巡撫

而以副都御史列其姓名於都察院衙門是其時舊制

雍正間或用人惟賢或因事權授往往不拘定制而兩人同署
西安巡撫則史貽直碩色也協辦山西巡撫則布政高成齡也
協辦山東巡撫則吏部左侍郎劉於義也協理直隸總督則劉
師恕也管兩淮鹽政兼署織造則布政高斌也

乾隆四十八年以漕運河道總督與各省總督不同故給兵部
侍郎右副都御史銜與巡撫同

順治間河道總督駐濟甯康熙十七年移清江浦二十七年移
濟甯以協理之侍郎開音布徐廷璽駐清江浦三十一年總河
移清江浦三十九年裁協理四十四年山東河道交巡撫管理
雍正二年設副總河於武陟五年以副總河管山東河南河務
七年分設南河河道總督駐清江浦改副總河爲山東河南河

道總督駐濟甯八年設直隸河道水利總督駐天津於是北河南河東河爲三督若協理協辦幫辦學習諸名又隨時別經簡派者自康熙至嘉慶往往有之非定員也九年設北河副總河於固安又設東河副總河移南河副總河駐徐州乾隆二年副總河俱裁六年復設南河副總河旋裁十四年裁直隸河督歸總督管理於是總河凡二人而加南河協辦河務官其後協辦歸巡漕御史南河以兩江總督總理山東河南巡撫亦兼河務二十二年設南河副總河二十三年裁嘉慶十一年設南河副總河十五年裁十九年設東河副總河二十年裁道光二年巡漕御史裁六年設南河副總河九年裁

舊時安徽藩司駐江甯辦上江事乾隆二十五年增設江甯藩司移安徽藩司駐安慶

國初直隸不設藩臬以守道司度支巡道司刑名通永大名霸

昌天津口北五道掛山東山西河南布政按察司銜

即參政參議副使僉

事等

康熙間猶然見二十四年胡昇猷所上疏雍正初改守巡

二道爲兩司各道掛直隸布政按察司銜各省布按兩司初但設本司正副官後因事添設守巡二道遂以爲例往往一道止轄一府或數道共轄一府見任源祥職官議

國初各省有左布政右布政惟貴州以事簡止設左布政一員知府舊爲正四品道員則視所帶布政使司參政參議按察使司副使僉事兼銜爲等差有三四五品之異乾隆十八年以錢穀刑名二司分任道雖兼銜事難越俎且知府爲道所轄而兼參議僉事銜者階級反較知府爲卑不足以示表率因定守巡各道皆正四品停兼銜而改知府爲從四品

附錄 舊時道員結銜如陝西則有陝西布政使司分守潼
商道僉事陝西按察使司分巡榆葭道副使陝西按察使司
分巡延綏鄜道參議陝西按察使司分巡漢興道副使之別
他省可以類推

往制府佐貳衛千總領運康熙六十一年定糧道押運過淮總
漕督運交通倉雍正初專其事於糧道而遣御史分巡沿途漕
務

甘肅西甯道兼理蒙番事乾隆間定專用滿蒙人員後總督那
彥成以龍萬育奏調遂相沿參用漢人嘉慶庚辰復奉 旨不
用漢員又如直隸之口北道山西之歸綏道亦皆用滿員
臺灣道加按察使銜俾奏事自乾隆五十三年臺灣道萬鍾傑
始

御史外授道府雍正時猶有仍兼御史銜者如單疇書爲甯夏道仍兼御史銜是也

國初滿人不占知府缺以滿洲郎中員外外轉卽布按也

國初江浙有船政同知管理修造糧船侵漁最甚雍正二年裁曲阜縣唐宋以來多以聖裔領縣事金元以衍聖公兼知縣事明改爲世職由衍聖公保舉嘉靖後不由衍聖公保舉 國初由衍聖公咨部題授雍正二年兗州知府吳關杰奏請揀補不授孔氏未允行至乾隆二十一年 命在外題調不復爲孔氏世職矣

向例外官告病不準起用其仍準起用之例自康熙十二年始外官迴避原籍五百里以內自康熙四十二年始

舊時繼母年老無終養例康熙九年浙撫范承謨疏言知縣丁

世清以繼母劉年老呈請終養吏部議駁奉 特旨允行嗣後繼母生母皆準終養

臺灣文員知縣以上年過四十無子者始準攜眷此例不知始於何時乾隆四十一年命停止

曩八旗文武官遇親喪百日後入署辦事朝會祭祀亦與乾隆二年 諭二十七月之內朝會祭祀免其行走又百日後外用督撫等官者稱署某處某官二十七月後始實授

國初考試月選官令作八股文康熙五十七年停止仍令寫履歷以三百字爲限

京官舊例歷俸六年始準乞假省親雍正七年 命急欲省親者準呈請毋以年限

雍正十一年 世宗以河防關繫重大而全河形勢非講求閔

歷不能洞曉機宜 特命部院慎選司官二員引見後派往學

習如才堪任用卽保奏留工道光間復循故事舉行而翰詹都

察院等衙門亦得與選

雍正間選派部員從布政使高斌請也

直省知縣正途出身者三年行取一次大省三人中省二人小

省一人吏部按期奏請沿前明舊制也康熙四十四年從部議

行取知縣以主事用遇考選科道時方準考選然康熙雍正間

行取之例少舉多停乾隆初亦間行之其實前明專重資格按

俸遷轉不得不以部用一途疏通壅滯 本朝州縣之賢能者

得奏題擢用且繁劇之任參罰必多凡無事故合行取例者大

約居中簡之缺尋常供職幸免處分者耳故事相沿於吏治無

益乾隆十六年 命永遠停止

旗人不作驛丞典史雍正六年奉 旨議定

三載考績文武大臣具疏自陳襲前明舊制也順治間京官三品以上及各省督撫康熙間增盛京侍郎雍正間增奉天府尹皆自陳乾隆八年 命自陳乞罷者舉賢自代繼 命宗室王公兼閣部事者不必自陳十五年 命御前大臣領侍衛內大臣御前侍衛乾清門侍衛兼閣部及八旗事者不必自陳十七年停止內外大臣自陳之例二十四年 勅部於京察年分將尙書至三品京堂以上及直省督撫軍政年分將都統副都統駐防之將軍都統副都統及提督總兵官分別繕本進呈聽候鑒察有以衰庸解退者皆出自 聖裁

國初沿明制以吏科都給事中給事中與河南道掌計典後命各部院堂上官各察其屬之優劣而等第之彙送吏部吏部定期按冊點驗謂之過堂其薦舉者引見後候 旨錄用又京

察各官於吏部過堂時惟翰詹衙門不唱名但稱某官幾員則管部事大學士以下皆起立云請回俗謂之過半堂

外官三年大計用才守政年四格始於順治三年康熙初停止四年復行二十四年停布按卓異

附錄 康熙二十二年大計藩臬舉卓異者多總憲徐公元文上言舊例藩臬入覲雖許條奏地方事宜然僅由通政司投遞引見一次辭朝卽行於述職之實猶有未盡請令面奏並加諮訪庶可知其才具之優劣并以見督撫所舉當否聖祖是公言至日御乾清門科道侍班通政司引藩臬官以次面奏著爲令明年有 旨藩臬勿舉卓異

卓異官引見向例文職賞朝衣武職賞蟒袍蓋古者車服以庸之義日久漸成具文價浮物倣乾隆間遂改爲引見後準卓異

者加一級

雲貴川廣福建甘肅湖南等省督撫提鎮藩臬有丁憂事故由驛限行四百里馳奏乾隆二十七年定以邊遠省分非驛遞不能速也

順治元年定衍聖公封爵一如前朝階正一品在尙書上正一真人舊襲一品乾隆時副都御史梅穀成奏請量加裁抑經大學士等會議降爲五品其時法官婁近垣係四品高宗謂真人品秩不可過貶因命視三品秩

同官迴避乾隆間法始密其先如福建巡撫趙國麟與藩司劉藩長聯姻係雍正十二年具奏允行又雍正間魏經國爲湖廣提督特旨以其子魏瓚爲提標中軍守備及爲松江提督以次子魏琨補泰州營遊擊其時固不拘迴避之說也後則部例

日繁矣今祇有捐免迴避之例

開列內外官階銜姓名彙刊成帙謂之縉紳吏部按季呈進如十二月杪卽進明年春季縉紳以備觀覽曩時縉紳首帙有各直省輿地圖雖不詳悉而規模略具今則不復有矣

附錄 阮文達元順治縉紳冊跋云余家藏嘉靖縉紳冊得自闕里孔氏其京職一本題爲縉紳至外省則不加之以縉紳之目此順治十八年縉紳冊則通稱爲縉紳矣又嘉靖本於各省總督巡撫皆列於都察院衙門副憲之後而外省則但自布政司始此冊於都察院旣列各省總督巡撫矣而各外省又重列之已駸駸乎不列於京職故冊首葉題曰新刊隨省總督撫按總鎮縉紳曰新刊隨省者明乎舊之不隨省也此冊外省提鎮亦列京職在鑾儀衛衙門之後今亦皆隨

省矣

舊制京官並許條陳康熙十年憲臣奏請停止凡非言官而建
言爲越職例當降調至言路大開之時卽非言官亦許陳奏其
不應具摺者準臚舉條陳赴都察院呈請代奏

國初嘗議裁天下教官王公太岳疏爭之雍正間欲設知州知
縣副官鄂文端奏止其事

歲貢廷試教官選外省實爲寒儒苦事 國朝改明制教官銓
授本省歲貢免赴京德政也

國初府州大縣裁訓導小縣裁教諭康熙四年復設故教諭訓
導有正復之別又康熙中有俊秀監生捐納教職例三十年江
南學政許汝霖請凡捐學正教諭改縣丞訓導改主簿自後惟
生員始得捐而教授必由科目

順天府舊設文武教授訓導沿明制也雍正四年裁武學統歸儒學管束滿洲生員亦屬漢官月課

世祖時招民授職費至七八千兩有至萬金者仍行考試文理通順者爲知縣不通者改授守備此捐例之始然仍行考試而以文武分途不失慎重之意

今制嘉峪關外南路回疆八城有葉爾羌總理回疆事務參贊大臣一員兼管和闐事務協辦大臣一員烏什辦事大臣一員幫辦大臣一員喀什噶爾領隊大臣一員

隆三十年烏什亂移烏什五十三年復移此道光十庫車辦事大臣一員仍移葉爾羌原設幫辦大臣改爲領隊大臣

大臣一員阿克蘇辦事大臣一員喀拉沙爾辦事大臣一員和

闐辦事大臣一員英吉沙爾領隊大臣一員北路各城有伊犁

將軍一員

屬下有協領參領防禦驍騎校等官參贊大臣一員

道光間張格領隊大臣五員烏里雅蘇臺定邊左副將軍一員
爾平增設
屬下有協領參領佐領防禦驍騎校等官
贊大臣一員幫辦大臣一員塔爾巴哈臺參贊大臣一員領隊
大臣二員烏魯木齊都統一員
屬下有協領參領佐領防禦驍騎校等官
一員庫倫辦事大臣一員幫辦大臣一員
圖治喀爾喀及恰克古
城領隊大臣一員庫爾喀拉烏蘇領隊大臣一員吐魯番領隊
大臣一員巴里坤領隊大臣一員哈密辦事大臣一員幫辦大
臣一員除伊犁將軍定邊左副將軍烏魯木齊都統外軍機處
於每月初五二十兩次開單進呈西甯辦事大臣西藏辦事大
臣亦同開列每年十月復將各處期滿大臣開單進呈謂之換
班或留或別簡無一定亦有不及期而更易者

按烏魯木齊有提督伊犁巴里坤有總兵哈密有副將其所

屬有參將遊擊等官則別爲綠營也又駐藏大臣舊設二員後裁去一員乾隆十四年仍設二員

國初武職品級較文職爲大康熙三十三年始裁定又文職自正一品起至從九品爲十八階武職自從一品起至正七品爲十二階舊制也乾隆五十一年以領侍衛內大臣爲武職正一品綠營以提督爲從一品無正一品其從七品以下五階以內外武職微員按其職守酌分正從照文階一體釐定又舊制武職正從一品封榮祿大夫正二品至從五品皆封將軍乾隆二十年更定官制則皆稱大夫五品以下改稱爲郎各冠以武字五十一年高宗以將軍爲專閫之重大夫爲文臣之稱名義混淆不足示後乃改一品至從二品封將軍正三品至從四品封都尉正五品至從七品封騎尉正八品至從九品封校尉自

五品以下凡從於騎尉校尉上以佐字繫之

國初京城裁五軍都督府設八旗都統副都統等官外省綠營之提督總兵皆如舊仍掛左都督都督同知僉事等銜其時提鎮皆用漢人後始參用滿蒙而裁兼銜

國初有京衛如神武左金吾左金吾右騰驤右龍驤衛燕山左燕山右永清左忠義前彭城衛大抵皆沿明舊旋裁

國初提鎮甚多以順治十八年官冊考之有掛鎮海大將軍印鎮守京口都統一鎮守沿江沿海副都統二鎮守京口左路水師總兵官一鎮守京口右路水師總兵官一隨征江南左路提督總兵官左都督一隨征江南右路總兵官都督僉事一鎮守雲南團練火器總兵官一鎮守天津防海統轄水陸官兵總兵官都督僉事一鎮守真保各關總兵官都督僉事一鎮守宣府

掛鎮朔將軍印轄七十一城堡總兵官都督同知一鎮守大同掛印總兵官都督僉事一鎮守臨清等處總兵官都督僉事一鎮守沂州等處總兵官都督僉事一鎮守河北等處總兵官都督同知一鎮守汝南等處總兵官都督僉事一提督陝西統轄滿兵駐西安總兵官一提督陝西統轄漢兵管固原鎮事一掛印鎮守漢羌興安等處總兵官都督僉事一鎮守甘肅等處掛平羌將軍印總兵官都督僉事一鎮守延綏等處掛印總兵官都督同知一鎮守甯夏等處總兵官都督同知一鎮守臨鞏等處總兵官左都督一提督江南統轄滿兵駐江甯總兵官一總管提督江南江安等處統轄漢兵總兵官一提督江南蘇松等處總兵官左都督一鎮守蘇松等處水師總兵官都督僉事一提督全浙總兵官左都督一鎮守甯紹溫台等處總兵官都督

僉事一鎮守金華等處總兵官左都督一鎮守甯波等處水師
總兵官都督僉事一隨征福建中路等處總兵官都督同知一
鎮守温州等處總兵官都督僉事一提督江西全省總兵官都
督同知一鎮守九江等處總兵官都督同知一鎮守南贛等處
總兵官都督僉事一提督湖廣全省總兵官左都督一提督貴
州等處總兵官左都督一鎮守雲南臨沅廣西等處提督總兵
官右都督一鎮守襄陽等處總兵官左都督一鎮守鄖陽等處
總兵官都督僉事一鎮守荊州等處總兵官都督同知一鎮守
辰常等處總兵官都督同知一鎮守偏沅等處總兵官都督僉
事一鎮守湖廣彝陵等處總兵官左都督一鎮守湖廣益陽等
處總兵官左都督一鎮守湖廣祁陽等處總兵官都督僉事一
鎮守湖廣沅州等處總兵官都督僉事一鎮守湖南左路等處

總兵官都督同知一鎮守湖南右路等處總兵官都督僉事一

提督福建等處總兵官左都督一鎮守福建興泉漳等處

駐漳州

兼管溫州一府右路總兵官都督同知一鎮守福建延建汀邵

等處

駐汀州

左路總兵官左都督一鎮守福建興泉漳等處右路

總兵官左都督一勦撫四川左路等處總兵官都督僉事一勦

撫四川右路等處總兵官都督同知一鎮守四川川北等處總

兵官都督僉事一鎮守四川永甯等處總兵官都督同知一鎮

守四川遵義等處總兵官都督同知一鎮守四川重慶等處總

兵官都督僉事一靖藩鎮守廣東等處左翼總兵官左都督一

靖藩鎮守廣東右翼總兵官右都督一平藩鎮守廣東等處左

翼總兵官左都督一平藩鎮守廣東等處右翼總兵官右都督

一鎮守廣州等處兼制沿海水師總兵官都督同知一鎮守惠

州等處總兵官都督同知一鎮守潮州饒平等處援勦無分疆界閩界掛印總兵官左都督一鎮守肇慶海防等處總兵官都督僉事一鎮守高雷廉州等處總兵官都督僉事一鎮守廣東碣石水師沿海等處掛印總兵官左都督一鎮守瓊州等處總兵官都督同知一鎮守廣西地方總領官掛征蠻將軍印提督各路土司控制苗夷總兵官左都督一鎮守廣西全州等處總兵官都督僉事一定藩左翼鎮守潯梧平樂等處總兵官都督僉事一定藩右翼援勦柳慶等處兼撫苗夷總兵官左都督一鎮守潮州等處總兵官都督僉事一鎮守四川建昌等處總兵官都督同知一提督四川全省地方總兵官都督同知一

康熙間以陝西總兵何天培

陝西人

爲都統尋爲京口將軍天培

遂歸正白旗籍其後温州總兵李華平陽總兵

温州屬縣後裁總兵

王應

虎相繼爲福州副都統皆漢人此當在設八旗駐防之前
康熙間以湖廣提督徐治都勞績懋著援施琅孫思克授將軍
例授徐治都爲鎮平將軍是其時將軍爲提督進階非實有其
官也迨後設立八旗駐防以將軍都統統之自後將軍專爲滿
洲武職一品無漢人矣

養吉齋叢錄卷三終